

14 OCT 2002

Mahathir-Lawatan/I

PM LAWAT INDIA, PAKISTAN DAN ARAB SAUDI

KUALA LUMPUR, 14 OKT (Bernama) -- Perdana Menteri Datuk Seri Dr Mahathir Mohamad akan melakukan lawatan kerja ke India, Pakistan dan Arab Saudi dari 16 hingga 21 Oktober.

Kementerian Luar dalam satu kenyataan di sini hari ini berkata lawatan itu bertujuan meningkatkan hubungan dua hala serta mempromosikan kerjasama ekonomi untuk manfaat bersama.

Dr Mahathir akan diiringi isterinya, Datin Seri Dr Siti Hasmah Mohd Ali dan satu delegasi membabitkan menteri-menteri kabinet, pegawai kanan kerajaan dan wakil media.

Di New Delhi, Dr Mahathir dijadual menemui Perdana Menteri India Atal Bihari Vajpayee dan juga Presiden APJ Abdul Kalam.

Dr Mahathir juga dijangka berucap pada Sidang Kemuncak Perniagaan India-Asean serta melihat sendiri pembangunan sektor teknologi maklumat (IT) di Hyderabad.

Di Pakistan, Perdana Menteri akan melancarkan Stesen Janakuasa TNB serta menyaksikan majlis menandatangani dua memorandum persefahaman (MoU) antara Malaysia dan Pakistan.

Dr Mahathir juga akan mengunjungi Presiden Pakistan Pervez Musharaff yang akan diikuti dengan perbincangan dua hala.

Di Arab Saudi, Dr Mahathir dijangka menyampaikan ucap-tama pada seminar "Wawasan masa depan ekonomi Arab Saudi hingga Tahun 2020".

Dr Mahathir juga akan bertemu dan berdialog dengan tokoh korporat pada satu majlis anjuran Majlis Perniagaan Arab Saudi-Malaysia.

-- BERNAMA

NN RV LAT